

四庫全書

集部

欽定四庫全書

集部  
毘陵集卷一至四

詳校官太常寺少卿臣陳桂森

檢討臣何思鈞覆勘

總校官降調編修臣倉聖脉

校對官中書臣陸 湘

謄錄監生臣朱輔地

欽定四庫全書

集部二

毘陵集

別集類一唐

提要

臣等謹案毘陵集二十卷唐獨孤及撰及字至之洛陽人官至司封郎中常州刺史卒諡曰憲事迹具唐書本傳權德輿作及諡議稱其立言遣詞有古風格濬波瀾而去流宕得菁華而無枝葉皇甫湜論業亦稱及文如危

峰絕壁穿倚霄漢長松怪石顛倒巖壑王士禎香祖筆記則謂其序記尚沿唐習碑版叙事稍見情實仙掌函谷二銘琅邪溪述馬退山茅亭記風后八陣圖記是其傑作文粹畧已載之頗不以湔言為然考唐自貞觀以後文士皆沿六朝之體經開元天寶詩格大變而文格猶襲舊規元結與及始奮起湔除蕭穎士李華左右之其後韓柳繼起唐之古文

遂蔚然極盛，斷雕為樸，數子實居首功。唐實

錄稱韓愈學獨孤及之，文當必有據。

案此據晁氏讀

書志所引特風氣初開明而未融耳。士禎于筆路

縷繆之初責，以制禮作樂之事，是未尚論其

世也。集為其門人安定梁肅所編，李舟為之

序。凡詩三卷，文十七卷。舊本久湮，明吳寬自

內閣鈔出，始傳於世。其中如景皇帝配天議

郭知運、呂諲等謚議，皆粹然儒者之言，非徒

以詞采為勝不止士禎所舉諸篇至馬退山  
茅亭記乃柳宗元作後人誤入及集士禎一  
例稱之尤疎於考證矣又文苑英華載有及  
賀赦二表代獨孤將軍讓魏州刺史表為崔  
使君讓潤州表代于京兆請停官侍親表唐  
文粹又有及招北客文集內皆無之按賀赦  
表所云誅剪大憝清復闕廷及歸過罪已降  
去鴻名並德宗興元時事及沒於大厯十二

年已不及見招北客文苑英華又以為岑  
參之作彼此錯互疑莫能詳今依舊本闕載  
焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀





毘陵集原序

傳曰物生而後有象象而後有滋滋而後有數數成而  
文見矣始自天地終于草木不能無文也而況於人乎  
且夫日月星辰天之文也丘隴川瀆地之文也羽毛彪  
炳鳥獸之文也華葉彩錯草木之文也天無文四時不  
行矣地無文九州不別矣鳥獸草木之無文則混然而  
無名而人不能用之矣人無文則禮無以辨其數樂無  
以成其章有國者無以行其刑政立言者無以存其勸

誠文之時用大矣哉在人賢者得其大者禮樂刑政勸  
誠是也不肖者得其細者或附會小說以立異端或彫  
斲成言以裨對句或志近物以玩童心或順庸聲以諧  
俚耳其甚者則矯誣盛德汙蟣風教為蠱為蠹為妖為  
孽噫文之弊有至是者可無痛乎天后時廣漢陳子昂  
獨泝隤波以趣清源自茲作者稍稍而出先大夫常因  
講文謂小子曰吾友蘭陵蕭茂挺趙郡李遐叔長樂賈  
幼幾洎所知河南獨孤至之皆憲章六藝能探古人述

作之旨賈為玄宗巡蜀分命之詔厯厯如西漢時文若  
使三賢繼司王言或載史筆則典謨訓誥誓命之書可  
彷彿於將來矣嗚呼三公皆不處此地而連蹇多故唯  
獨孤至之常州刺史享年亦促豈天之未欲振斯文耶  
小子所不能知也已矣常州諱及有遺文三百篇安定  
梁肅編為上下帙凡二十卷作為後序常州愛士而肅  
最為所重討論居多故其為文之意肅能言之比葬博  
陵崔貽孫又為神道碑悉載事行而痛其不登論道之

位崔公剛而好直其詞不黨君子謂之知言者昔班固  
美漢得人之盛曰文章則司馬遷相如又曰劉向王褒  
以文章顯是則四君子者有漢之文雄歟而遷無鄉曲  
之譽虧大雅明哲保身之義相如薄於貞操有滌器受  
金之累向無威儀遺文以謬而身幾不免褒多為歌頌  
當時議者以為婬靡不急其他無聞焉大較詞人多陷  
輕躁否則悞狹迂僻於事放弛其能蹈履中道可為物  
主者寡矣孰與常州發論措辭皆王霸大畧孝弟之至

達於神明善與人交久而敬之當官正色不畏強禦加  
之以仁惠愛物吏民敬鄉而文又如是乎其餘則二君  
既言之矣今亶錄崔氏之作綴於篇末云爾朝議大夫  
前守虔州刺史隴西李舟述

欽定四庫全書

原序

欽定四庫全書

毘陵集卷一

賦

夢遠遊賦

詩上 二十三首

壬辰歲過舊居

夏中酬于遜畢耀問病見贈

唐 獨孤及 撰

三月三日自京到華陰水亭獨酌寄裴六薛

八

海上寄蕭立

酬梁二十宋中所贈兼別梁少府

東平蓬萊驛夜宴平盧楊判官醉後贈別

觀海

雨後公超谷北原眺望寄高拾遺

丙戌正月出洛陽書懷



季冬自嵩山赴洛道中

代書寄裴冀劉頻

客舍月下對酒醉後寄畢耀

庚子歲避地至玉山訓韓司馬所贈

下弋陽江舟中代書寄裴侍御

題思禪寺上方

早發若峴驛望廬山

癸卯歲赴南豐道中聞京師失守寄權士繇韓幼深

初晴抱琴登馬退山

賈員外處見中書賈舍人巴陵詩集覽之懷舊

代書寄贈

寒夜溪行舟中作

江上代書寄裴使君

與韓侍御同尋李七舍人不過題壁留贈

李張皇甫閻權等數公並有送別之作見寄因

答

賦

夢遠遊賦

老氏稱吾所以有大患者為吾有身大哉聖人之知微  
乎夫生者一氣之暫聚耳有天地之和自然之力以運  
其行止節其天壽非智力之所能扶明矣而舉世矻矻  
莫不保持形骸謂為已有特執迷妄往而不返小者攘禮  
樂竊忠信以賈譽大者盜天地之權至於忘身道德之  
衰皆此物也余生於浮而長於妄汨沒當世與羣動俱不

智不能逃形於名聲之韁鑠脫屣於冠冕之籠檻及其  
世界顛倒萬物反覆始返照收視以觀身世然後知一  
生之患假合豈直芻狗土苴熱燄聚沫而已則我之身  
也與百憂偕長況重險之中乎思欲冲三清出五濁乘  
凌虛極與造物者為伍莫有由矣嘗中夜夢飛昇太空  
若有以名跡見謂者覺而自失乃為賦以狀遠遊且旌  
悟道之晚也其詞曰

仰太素兮觀元精之烟煴孰官司乎物物兮得流形而

為人太皞遺我八卦藏天地於文字黼而黻之為聖為  
智褒衣之徒相與擊建鼓而揭日月兮奔孝慈而走仁  
義其弊也古是而今非身賤而名貴駟驪馭還兮道路  
屯雲而奔波絢煥轆轤兮玉帛鐘鼓之駢羅霍燹爵密兮心  
懸天地而火馳蒼黃兮得未終也而失已繼之百骸與  
日月並走五藏與哀樂交戰義和未及弭轡榮枯紛而  
萬變何生涯之侘傺兮蹇吾降此中州憑世道以上下  
若涉水而無津兮與吹萬同其波流況世緒缺軋兮如

勢絲之相摶見辰極之低昂兮知杞人之殷憂顧兔呀以蝕月兮天地閉而雲愁鳳凰焚其故巢兮遠舊國以失傳埃塏燭以上薄兮虞羅紛其四周吾始未知夫六合湫隘之若此孰與吾兮遠遊豈無太清之路兮夫何漫漫而迢遞望帝鄉之低徊兮微白雲與之偕逝澄予神於遙夜與顥氣期乎無垠真境沕穆以傍感精誠薰然而來親歛乘夢以奮飛搏至靈以上賓望見碧落天地如掌洞開八門別有萬象亭亭物外乘化直上身世雙

遣獨與道往其往也泛兮若遊魚振鱗而泳清川罔兮  
若翔雁得順風而緣秋天忽不知予誰之身夫何為者深  
入空界七耀在下問予津於混茫兮蹇徜徉以延佇若  
有人兮縹緲指人間以唁予曰鳳兮鳳兮何德之睽天  
固桎若以禮義桔若以事機蓋支離其德而逃乎物累  
使逸翮可得而籠樊兮孰云夫五色之自異天運地載  
剛柔生焉千變萬化如環無端彼興廢與往復同大壑  
之波瀾將令歸根明徵其源則吾與若皆幻也又奚睢

盱於其間幻未始有封物未始有壇成則虧進則傷無  
泊而和無易而方山立其中央善汝行密汝藏道將自  
光吾在大羅之上玄都之所乾坤為家日月為宇噓吸  
元氣太虛之下音尚一乃心勿謂道阻遊乎無窮吾顧  
見汝奉真誥以自省兮五情起其增熱哀攀龍之無階  
兮思過天之曷月未知去下方幾萬億兮退將返遵吾  
歸轍修玉虛以下降濟銀漢以中歇憑東井以俯視識  
故國之城闕千門萬戶遙如蟻穴百川綺分五嶽羅列



覓舊山與喬木纔依稀而明滅見伊川大道鞠為荊棘  
歷陽故人半作魚鼈曩之奔命於市朝者如紛紜飛馳  
譟譟嗤嗤蹙躑蹢躅肖翹陸離若蟣虱之聚壞絮蜘蛛  
之乘遊絲吾乃今日識羣動之變態兮莞然倚長空而  
笑之亦既自得周覽未畢惕焉形開萬象如失羣有儼  
以皆作百慮續其來歸乃夙昔之人寰如故時之喧卑  
向之俯仰欣感無非妄者然後知吾之生也與妄皆生邪  
氣乘之萬緣合併為憂為患為虧為盈彼君子方碌碌

然自以為覺猶飾妄以賈名安知聖人不以世界為重  
徃生死為大夢視變化與品類亦猶神交之飛動與遺物  
以顧身兮悟生浮而質陋以一氣之秒忽與萬化而紛  
糅自視俄然寄形宇宙尚何能濡首於榮辱之境甘心  
於哀樂之囿鷦鷯于飛載翩載翻君子至止栖息化元  
獨立道樞貽神胚渾萬物轉薄吾真長存止水不波浮  
雲無根與時盈虛委質乾坤倚伏相軋吉凶同源物各  
自爾予欲無言優哉游哉聊以窮年

詩上 二十三首

壬辰歲過舊居

少年事遠遊出入燕與秦  
離居歲周天猶作勞歌人  
負劒度潁水歸馬自知津  
緣源到舊廬攬涕尋荒榛  
隣里喜相勞壺觴展慙慙  
酒闌擊筑語及此離會因  
丈夫隨世波豈料百年身  
今日負鄙願多慙故山春

夏中酬于遯畢耀問病見贈

救物智所昧學仙願未從  
行藏兩乖角蹭蹬風波中  
薄

官恥降志卧病非養蒙閉關涉兩旬羈思浩無窮驚驚  
何處來雙舞下碧空離別隔雲雨惠然此相逢把手賀  
疾間舉杯欣酒濃新詩見久要清論激深衷高館舒夜  
簾開門延微風火雲赫嵯峨日暮千萬峯遙指故山笑  
相看撫號鐘聲和由心親事感知氣同出處未易料且  
歌緩愁容願君崇明德歲暮如青松

三月三日自京到華陰水亭獨酌寄裴六薛八  
祇役匪遑息經時客三秦還家問節候知到上巳辰山

縣何所有高城閉青春和風不吾欺桃杏滿四隣舊友  
適遠別誰當接歡忻呼兒命長瓢獨酌湘吳醇一酌一  
朗詠既酣意亦申言筌暫兩忘霞月祇相新裴子塵表  
物薛侯席上珍寄書二傲吏何日同車茵詎肯使空名  
終然羈此身他年解桎梏長作海上人

海上寄蕭立

朔風剪塞草寒露日夜結行行到瀛壖歸思生暮節驛  
樓見萬里延首望遼碣遠海入大荒平蕪際窮髮舊國

在夢想故人胡且越契濶阻風期荏苒成雨別海西望  
京口兩地各天末索居動經秋再笑知曷月日南望中  
盡唯見飛鳥滅音塵未易得何由慰飢渴

酬梁二十宋中所贈兼留別梁少府

少讀黃帝書肯不笑機事意猶負深衷未免名跡累厭  
貧學干祿欲徇賓王利甘為風波人豈復江海意擔簦  
平臺下是日飲羈思逢君道寸心暫喜一交臂緒言未  
及竟離念已復至甯陵望南丘雲雨成兩地途殊跡方

間河廣流且駛暮帆望不及覽贈心欲醉愛君如金錫  
昆弟皆茂異奕赫連絲衣榮養能錫類君子道未長深  
藏青雲器巨鱗有縱時今日不定議惟當加餐飯好我  
袖中字別離動經年莫道分首易

東平蓬萊驛夜宴平盧楊判官醉後贈別姚太  
守置酒留宴

驛樓漲海壖秋月寒城邊相見自不足況逢主人賢夜  
清酒濃人如玉一斗何啻直十千木蘭為樽金為杯江

金史四庫全書  
卷一  
南急管盧女絃齊童如花解郢曲起舞激楚歌採蓮固  
知別多相逢少樂極哀至心嬋娟少留莫辭醉前路方  
悠然明日分飛儻相憶祇應遙望西南天

### 觀海

北登渤澥島回首秦東門誰尸造物功鑿此天池源  
洞吞百谷周流無四垠廓然混茫際望見天地根白日  
自中吐扶桑如何捫迢遙蓬萊峯想像金臺存秦帝昔  
經此登臨冀飛翬揚旌百神會望日羣山奔徐福竟何



成羨門徒空言唯見石橋足千年潮水痕

兩後公超谷北原眺望寄高拾遺

崖口雨足收清光洗高天虹蜺歛殘靄山水含碧鮮遠  
空霞破露月輪薄雲片片成魚鱗五陵如舊渭如帶目  
極千里關山春朝來爽氣未易說畫取花峯贈遠人

丙戌歲正月出洛陽書懷

往歲衣褐見受服金馬門擬將忠與貞來酬主人恩天  
地暫雷雨洪波生平原窮鱗遂蹭蹬夙昔事空存幸逢

帝出震授鉞清東藩白日忽再中萬方咸駿奔王風從  
西來春光滿乾坤蟄蟲競飛動余亦辭籠樊遭遇思自  
強寵辱安足言唯將四方志迴首謝故園

季冬自嵩山赴洛道中作

皇運偶中變長蛇食東土天蓋西北傾衆星殞如雨邊  
塵動地起千里聞戰鼓死人成為阜流血塗草莽策馬  
何紛紛捐軀抗豺虎甘心赴國難誰謂荼荼苦天子初  
受命省方造區宇斬鯨安溟波截鰲作天柱三微復正

統五玉歸文祖不圖漢官儀今日忽再覩升高混京邑

佳氣連海浦寶鼎歆景雲明堂舞干羽虎臣缺激昂缺

禦侮腐儒著縫掖何處議鄒魯西上轅轅山丘陵

橫今古和氣蒸萬物臘月春靄吐得為太平人窮達不足數他日遇封禪著書繼三五

代書寄裴六冀劉二頴

昔余馬首東君在海北汭

音入聲

盡屏簿領書相與議巖

穴載來詣佳境每山有車轍長嘯林木動高歌唾壺缺

此辭月未周戎馬嘶絳闕猛虎踞大道九州當中裂聞  
君棄孤城猶自握漢節恥栖惡木影忍與故山別脫舄  
桂嶺雲罔然若鳥逝入聲惟留潺湲水分付練溪月爾來  
大谷梨白花再成雪關梁限天險歡樂竟兩絕大盜近  
削平三川今底寧勾芒布春令屏翳收雷霆伊洛日夜  
漲鳴皋蘭杜青騫騫兩黃鵠何處遊青冥疇昔切玉刀  
應如新發硎及時當樹勲高懸景鐘銘莫拖白雲意徑  
往丹丘庭功成儻長揖然後謀滄溟

客舍月下對酒醉後寄畢四耀

鄉路風雪深生事憂患迫天長波瀾廣高舉無六翮獨  
立寒夜移幽境思彌積霜月照膽淨銀河入簷白沽酒  
聊自勞開罇坐簷隙主人奏絲桐能使高興劇清機暫  
無累獻酢更絡繹慷慨葛天歌悵悵廣陵陌既醉萬事  
遣耳熱心亦適視身兀如泥瞪目傲今昔故人間城關  
音信兩脈脈別時前盟在寸景莫自擲

先是畢贈及詩  
云洪鑪無久停

日月速若飛忽然街  
人身飲酒不須疑

心與白日鬪十無一滿百寓形薪

金史四庫全書  
火內甘作天地客與物無親疎斗酒勝竹帛何必用自  
苦將貽古賢責

庚子歲避地至玉山酬韓司馬所贈

滄海疾風起洪波駭恬鱗已無濟川分甘作乘桴人揮  
手謝秣陵舉帆指甌閩安知風塵表偶與瓊瑤親共悲  
行路難况逢江南春故園忽如夢返復知何辰曠野豺  
虎滿深山蘭蕙新枉君灞陵什迴首徒酸辛

下弋陽江舟中代書寄裴侍御

故鄉隔西日去水連長天前路知幾許但指天南邊愴  
恨極浦外隱映青山連東風滿帆來五兩如弓絃遙羨  
繡衣客罔然馬首先得餐武昌魚不顧潯陽田屈指數  
別日忽乎成兩年百花已滿眼春草漸碧鮮豈是離居  
時奈何于役牽洞庭有深涉曷日期歸旋且作異鄉料  
詎知攜手緣離憂未易銷莫道罇酒賢

題思禪寺上方

溪口聞法鼓停橈登翠屏攀雲到金界合掌開禪扃鬱

律衆山抱空濛花雨零老僧指香樓云是不死庭眇眇  
於越路茫茫春草青遠山噴百谷繚繞馳東溟目極道  
何在境照心亦冥騷然諸根空破結如破瓶下視三界  
狹但聞五濁腥山中有良藥吾欲墮天形

早發若峴驛望廬山

雨罷山翠鮮泠泠東風好斷崖雲生處是向峯頂道誰  
謂峯頂遠跂予可瞻討忘緣祛天機脫屣恨不早祇恐  
歲云暮遂與空名老心往跡未并慙媿山上草



癸卯歲赴南豐道中聞京師失守寄權士繇韓  
幼深

種田不遇歲榮名不遭時邊塵晦落日西望泣路歧猛  
虎嘯北風厲廢皆載馳深泥駕疲牛蹉蹕余何之詰屈  
白道轉繚繞清溪隨荒谷嘯山鬼深林啼子規長歎指  
故山三奏歸來詞不逢眼中人調若車倭遲士繇松筠  
操幼深瓊樹姿別來平安否何階一申眉白雲失帝鄉  
遠水限天涯昂藏雙威鳳曷月還兩枝努力愛華髮盛

年振羽儀但令迤難康不負滄洲期莫作新亭泣徒使  
夷吾嗤

初晴抱琴登馬退山對酒望遠醉後作

年長心易感況為憂患纏壯圖迫世故行止兩茫然王  
旅方伐叛虎臣方被堅魯人著儒服甘就南山田挈榼  
上高蹬超遙望平川滄江大如綆隱映入遠天荒服何  
所有山花雪中燃寒泉得日景吐雷鳴湔湔舉酒勸白  
雲唱歌慰頽年微風度竹來韻我號鍾絃一彈一引滿

耳熱知心宣曲終余亦酣起舞山水前人生幾何時大  
半百憂煎今日羈愁破始知濁酒賢

賈員外處見中書賈舍人巴陵詩集覽之懷舊  
代書寄贈

海岸望青瑣雲長天漫漫十年不一展知有關山難適  
逢阮始平立馬問平安取公詠懷詩示我江海瀾暫若  
窺武庫森然矛戟寒眼明遺頭風心悅忘朝餐大駕今  
返正熊羆扈鳴鑾公遊鳳凰沼獻可在筆端繫越有長

纓封關祇一九罔然翔寥廓仰望慙羽翰嘉會不我與  
相思歲云殫惟當袖佳句持比青琅玕

寒夜溪行舟中作

日沈諸山昏寂歷羣動宿孤舟獨不繫風水夜相逐雲  
歸恒星見霜下天地肅月輪大如盤金波入空谷魏闕  
萬里道羈念千慮束倦飛思故巢敢望梧與竹沈吟登  
樓賦中夜起三復憂來無良方歸候春酒熟

江上代書寄裴使君

何地離念劇江皋風雪時艱難傷遠道老大怯前期疇  
昔行藏計祇將力命推能令書信數猶足緩相思

與韓侍御同尋李七舍人不遇題壁留贈

三徑何寂寂主人山上山亭空簷月在水落釣磯閒藥  
院鷄犬靜酒壚苔蘚斑知君少機事當待暮雲還

李張皇甫閻權等數公並有送別之作見寄因

答

洞庭正波蘋葉衰豈是秦吳遠別時謝君篋中綺端贈

何以報之長相思

毘陵集卷一

欽定四庫全書

毘陵集卷二

唐 獨孤及 撰

詩中 三十一首

送陳兼應辟兼寄高適賈至

早發龍沮館舟中寄東海徐司倉鄭司戶

海上懷華中舊遊

將還越留別豫章諸公

雜詩

山中春思

傷春懷歸

九日李蘇州東樓宴

李卿東池夜宴

將赴京荅李紆贈別

江寧訓鄭縣劉少府贈別

送虢州王錄事之任



送長孫將軍拜歙州之任

送何員外使湖南

送江陵全少府赴任

送虞秀才之長沙

送陽翟張主簿之任

送李賓客荆南迎親

酬常邵縣

送游員外赴淮西

送馬鄭州

蕭文學山池宴集

送荆南張判官

送義烏韋明府

送相里郎中赴江西

和虞部韋郎中尋楊駙馬不遇

和贈遠

和題藤架

官渡柳歌送李員外赴揚州

同岑郎中韋員外花樹歌

奉和李尚書畫虎射圖歌

詩中

三十一首

送陳兼應辟兼寄高適賈至

結綠處燕石卞和不必知所以王佐材未能忘茅茨罷  
官梁山外獲稻楚水湄適會傳巖人虛舟濟川時天網  
忽搖頓公才難棄遺鳳凰翔千仞今始一鳴岐上馬指

國門舉鞭謝書帷預知大人賦掩却歸來詞天子方在  
宥朝廷張四維料君能獻可努力副疇咨舊友滿皇州  
高冠飛翠蕤相逢絳闕下應道軒車遲高侯秉戎翰策  
馬觀西夷方從幕中事叅謀王者師賈生去洛陽焜耀  
琳琅姿芳名動北部逸韻凌南皮肅肅舉鴻毛泠然順  
風吹波流有同異由是限別離漢塞隔隴底秦川連鎬  
池白雲日夜滿道里安可思夢想浩盈積物華愁變衰  
因君附錯刀送遠益悽其四海各橫絕九霄應易期不

知故巢燕決起棲何枝

早發龍沮館舟中寄東海徐司倉鄭司戶

沙禽相呼曙色分  
漁浦鳴榔十里聞  
正當秋風度楚水  
況值遠道傷離羣  
津頭却望後湖岸  
別處已隔東山雲  
停艫目送北歸翼  
惜無瑤華持寄君

海上懷華中舊遊寄鄭縣劉少府造渭南王少

府崙

涼風臺上三峯月

王任鄭縣日於城角築小臺號涼風臺每與數公置酒登臨望二華雲月

不夜城邊萬里沙  
離別莫言關塞遠  
夢魂長在子真家  
將還越留別豫章諸公

客鳥倦飛思舊林  
徘徊戀衆花陰  
他時相憶雙航葦  
莫問吳江深不深

雜詩

日花結成子  
春物捨我去  
流年惜不得  
獨坐空閨暮  
心自有所待  
甘為物華悞  
未必千黃金  
買得一人顧

山中春思

懶祭川水大人家春日長獨謠晝不暮搔首慙年芳靡  
草知節換含葩向新陽不嫌三逕深為我生池塘亭午  
井竈閒雀聲響空倉花落沒履齒風動羣木香歸路雲  
水外天涯杳茫茫獨卷萬里心深入山鳥行芳景勿相  
迫春愁未遽忘

傷春懷歸

誰謂鄉可望望在天地涯但有時命同萬里共歲華昨  
夜南山雨殷雷拆萌芽源桃不余欺先發秦人家寂寂

戶外掩遲遲春日斜  
源桃默無言秦人獨長嗟  
不惜中腸苦但言會合賒  
思歸吾誰訴笑向南枝花

九月九日李蘇州東樓宴

是菊花開日當君乘興秋  
風前孟嘉帽月下庾公樓  
酒解留征客歌能破別愁  
醉歸無以贈祇奉萬年酬

李卿東池夜宴

政成機不擾心愜宴忘疲  
去燭延高月傾壘就小池  
舞盤迴雪動絃奏躍魚隨  
自是山公興誰令下士知



將赴京荅李紆贈別

膠漆常投分荆蠻各倦遊  
帝鄉今獨往溝水便分流  
甘作遠行客深慙不繫舟  
思君帶將緩豈直日三秋

江寧酬鄭縣劉少府兄贈別作

往年脫縫掖接武仕關西  
結綬腰章並趨階手板齊  
仙山不用買朋酒日相攜  
抵掌誇潭壑忘情向組珪  
事遷時既往年長跡逾睽  
何為青雲器猶嗟濁水泥  
役牽方遠別道在或先迷  
莫見良田晚遭時亦杖藜

送虢州王錄事之任

謂子文章達當年羽翼高一經俄白首三命尚青袍未  
遇須臾藏器安卑莫告勞盤根儻相值試用發硎刀

送長孫將軍拜歙州之任

臨難敢橫行遭時取盛名五兵常典校四十又專城浪  
逐樓船破風從虎竹生島夷今可料繫頸有餘纓

送何員外使湖南

夙昔皆黃綬差池復瑣聞上田無晚熟逸駟果先飛前

路舟休繫故山雲不歸王程儻未復莫遣鯉魚稀

送江陵全少府赴任

冢司方眷選劇縣得英髦固是攀雲漸何嗟趨府勞楚  
山迎驛路漢水漲秋濤騫翥方茲始看君六翮高

送虞秀才擢第歸長沙

充賦名今遂安親事不違甲科文比玉歸路錦為衣海  
運同鯤化風帆若鳥飛知君到三徑松菊有光輝

送陽翟張主簿之任

舊聞陽翟縣西接鳳高山作吏同山隱知君處劇閒少  
年當効用遠道豈辭艱遲子揚名後方期綵服還

送李賓客荆南迎親

宗室劉中壘文場謝客兒當為天北斗曾使海西陲毛  
節精誠著銅樓羽翼施還申供帳別言赴倚門期恩渥  
需行李晨昏在路岐君親兩報遂不敢議傷離

酬常邵縣見贈

愛君修政若修身鰥寡來歸乳雉馴堂上五絃銷暇日

邑中千室有陽春  
謂乘鳬舄朝天子  
却媿猪肝累主人  
辭後讀君懷縣作  
定知三歲字猶新

送游員外赴淮西

多君有奇略  
投筆佐元戎  
已佩郎官印  
兼乘御史驄  
使星隨驛騎  
歸路有秋風  
莫遣無書札  
他年懷袖空

送馬鄭州

使君朱兩轡  
春日整東轅  
芳草成臯路  
青山京水源  
勉修循吏跡  
以謝主人恩  
當使仁風動  
遙聽輿頌諠

蕭文學山池宴

檀欒千畝綠知是辟疆園遠岫當庭戶諸花覆水源  
主人邀盡醉林鳥助狂言莫問愁多少今皆付酒樽

送別荆南張判官

輜車駱馬往從誰夢浦蘭臺日更遲欲識桃花最多處  
前程問取武陵兒

送義烏韋明府

妙年能致身陳力復安親不憚關山遠寧辭簿領勤  
過

江雲滿路到縣海為隣每歎違心賞吳門正早春

送相里郎中赴江西

君把一尺詔南游濟滄浪受恩忘險艱不道岐路長戎  
狄方構患休牛殊未遑三秦千倉空戰卒如餓狼委輸  
員外府諏謀寄賢良有才當陳力安得遂翱翔豈不慎  
井賦賦均人亦康遙知軒車到萬室安耕桑火伏金氣  
騰旻天欲蒼茫寒蟬慘巴鄧秋色愁沅湘昨日攜手西  
於今芸再黃歡娛詎幾許復向天一方躑躅話世故惆

悵舉離觴共求數刻歡戲謔君此堂今日把手笑少時  
各他鄉身名同風波聚散未易量曷月還朝天及時開  
智囊前期儻猶濶加飯勉自強

和虞部韋郎中尋楊駙馬不遇

金屋瓊臺蕭史家暮春三月渭川花到君仙洞不相見  
謂已吹簫乘早霞

和贈遠

憶得去年春風至中庭桃李映瑣窻美人挾瑟對芳樹



玉顏亭亭與花雙今年新花如舊時去年美人不在茲  
借問離居恨深淺祇應獨有庭花知

和題籐架

萼萼葉成幄璀璨花落架花前離心苦愁至無日夜人  
去籐花千里強籐花無主為誰芳相思歷亂何由盡春  
日迢迢如線長

官渡柳歌送李員外承恩往揚州覲省

君不見官渡河兩岸三月楊柳枝千條萬條色一一勝

綠絲花作鈿粉絮葉成翠羽帳此時送遠人悵望春水  
上遠客折楊柳依依兩含情夾郎木蘭舟送郎千里行  
郎把紫泥書東征覲庭闈脫却貂襜褕新著五彩衣雙  
鳳并兩翅將雛東南飛五兩得便風幾日到揚州莫貪  
揚州好客行剝淹留郎到官渡頭春闌已應久慙慙道  
遠別為謝大堤柳攀條儻相憶五里一回首明年柳枝  
黃問郎還家否

同岑郎中屯田韋員外花樹歌

東風動地吹花發渭城桃李千樹雪芳菲可愛不可留  
武陵歸客心欲絕金華省郎惜佳辰祇將棣萼照青春  
君家自是成蹊處況有庭花作主人

和李尚書畫射虎圖歌

飢虎呀呀立當路萬夫震恐百獸怒彤弓金鏃當者誰  
鳴鞭飛控流星馳居然畫中見真態若務除惡不顧私  
時和年豐五兵已白額未誅壯士恥分銖遠邇懸轂中  
不中不發思全功捨矢如破石可裂應絃盡敵山為空

殺氣滿堂觀者駭颯若崖谷生長風精微入神在毫末  
作續造物何同功方叔秉鉞受命新丹青起予氣益振  
底綏靜難功可擬嗟嘆不足聲成文他時代天育萬物  
亦以此道安斯民

毘陵集卷二

欽定四庫全書

毘陵集卷三

唐 獨孤及 撰

詩下 二十八首

代書寄上李廣州

自東都還濠州奉酬王八諫議

酬皇甫侍御望瀟山見示

垂花塢醉後戲題

登山谷寺上方荅皇甫侍御卧疾闕陪車騎之  
後

詣開悟禪師問心法次第寄韓郎中

喜辱韓十四郎中書兼封近詩見示因代書題

荅

同皇甫侍御齋中春望見示

荅李滁州題庭前石竹花見寄

暮春於山谷寺上方遇恩命到加官賜服酬皇

甫侍御見賀之作

和張大夫秋日有懷呈院中諸公

和張大夫秋夜書情

傷春贈遠

送陳王府張長史還京

荅皇甫侍御北歸留別

得柳員外書附寄近詩書中兼報新主行營兵

馬因代書戲荅

同徐侍郎五雲溪新亭重陽宴集作

和中書常舍人晚秋集賢院即事寄贈徐薛二

侍郎

登後湖亭傷春懷京師故舊

荅李滁州見寄

水西館泛舟送王員外

得李滁州書以玉潭庄見託因書春思以詩代

荅



題玉潭

答李滁州憶玉潭新居見寄

和李大夫同呂評事太行苦熱行兼寄院中諸公  
雨後陪王員外泛後湖

陪王員外北樓待月

詩下 二十八首

代書寄上李廣州

岷水望番禺迢迢青天末鴻雁飛不到音塵何由達獨

有興人歌隔雲聲誼晤皆稱府君仁百越賴全活推誠  
魚鼈信持正魑魅怛疲民飽中和性足無天閼天子咨  
四岳佇公濟方割幾時復旋歸入踐青瑣闥賤子託明  
德繚若松上葛別離鄙吝生結念思所豁門闌關山阻  
岐路天地濶惟憑萬里書持用慰飢渴

自東都還濠州奉酬王八諫議見贈

關西仕時俱雅容彪彪之鬚始相逢天地變化縣城改

天寶中及尉華陰鄭縣別後經祿山之亂鄭縣殘毀城移於州西

獨有故人交態在不

言會合跡未并猶以歲寒心相待洛陽居守寄鄴侯君  
著貂冠叅運籌高閣連雲騎省夜新文會友涼風秋青  
袍白面昔攜手冉冉府趨君記否雲分兩散十五年始  
得一笑罇酒前未遑少留驟遠別况值旅雁鳴秋天二  
華舊遊如夢想他時再會何由緣賴君贈我郢中曲別  
後相思被管絃

酬皇甫侍御望天瀾山見示之作

早歲慕五嶽嘗為塵機礙孰知天柱峯今與郡齋對隱

嶙抱元氣氤氲含青靄雲崖媚遠空石壁寒古塞漢皇  
南遊日望秋此昭配法駕到谷口禮容振荒外焚柴百  
神趨執玉萬方會天旋物順動德布澤霽霈講武威已  
耀學仙功未艾黃金竟何成洪業遽淪昧度世若一瞬  
昨朝已千載如今封禪壇惟見雲雨晦長望哀往古勞  
生慙大塊清暉幸相娛幽獨知所賴寒城春方正初日  
明可愛萬殊喜陽和余亦荷時泰山色日夜綠下有清  
淺瀨媿作拳僂人沈迷簿書內登臨歎拘限出處悲老

大況聽郢中曲復識湘南態思免物累牽敢令道機退  
瞞然誦佳句持比秋蘭佩

垂花塢醉後戲題

賦得俱字韻  
并序一首

莊周臺南十許步有丘一成上有樛藤垂花而蔓草荒  
之且隔大溝路不可陟道士張太和伐薪為堰封土以  
壅澮余亦命薙氏治蕪穢而剗宿莽遂闢為登賦之位  
位廣一席席間足以函罇酒二簋三月戊子及羣英由  
堰而升焉諸花倒垂下拂杯案紫葩縞縱如釵如旒衆

君子瞻弄之不足故秉燭進酒以繼落日欲稱醉而不能也因命其地曰垂花塢堰曰緣花堰亦飾之以詩云紫蔓青條覆酒壺落花時與竹風俱歸時自負花前醉笑向儵魚問樂無

登山谷寺上方荅皇甫侍御卧疾闕陪車騎之後

梵宮香閣攀霞上天柱孤峯指掌看漢主馬蹤成蔓草

寺中間石上有窳穴古老相傳云漢武帝馬跡

法王身相示空棺

禪門第三祖祭太師遺塔

在此坊天寶中別駕李常開棺取  
金身茶毗收舍利重起塔供養

雲扶踴塔青霄庫

皮寄

反松蔭禪庭白日寒不見戴逵心莫展賴將新贈此琅

玕

詣開悟禪師問心法次第寄韓郎中

障深聞道晚根鈍出塵難濁劫相從慣迷途自謂安得  
知身垢妄始喜額珠完欲識真如體君嘗法味看

喜辱韓十四郎中書兼封近詩見示代書題贈

各牽于役間遊遨獨坐相思正鬱陶長跪讀書心暫緩

短章投我曲何高宦情緣水知非願王事敦

丁回反

人敢

告勞所歎在官成遠別徒言岷水纔

去聲

容舫

同皇甫侍御齋中春望見示之作

望遠思歸心易傷況將衰鬢偶年光時攀芳樹愁花盡  
晝掩高齋厭日長甘比流波辭舊浦忍看新草遍橫塘  
因君贈我江楓詠春思如今未易量

送李滁州題庭前石竹花見寄

殷

鳥閑反

疑曙霞染巧類匣刀裁不怕南風熱能迎小暑



開遊蜂憐色好思婦感年催覽贈添離恨愁腸日幾迴  
暮春於山谷寺上方遇恩命加官賜服酬皇甫  
侍御見賀之作

天書到法堂朽質被榮光自笑無功德殊恩謬激揚還  
登建禮署猶忝會稽章佳句慙相及稱仁豈易當

和張大夫秋日有懷呈院中諸公

至公無暇日高閣閉秋天肘印拘王事籬花思長年績  
成心不有慮澹物猶牽竊效泉魚躍因聞郢曲妍

和張大夫秋夜書情即事

上畧當分閭高情善閉關忘機羣動息無戰五兵閒鈴閣風傳漏書牕月滿山方知秋興作非惜二毛斑

傷春贈遠

去水流年日並馳年光客思兩相隨咨嗟斑鬢今承弁慙愧新荷又發池楊柳逶迤愁遠道鷓鴣啁哳怨南枝憶君何啻同瓊樹但向春風訴別離

送陳王府張長史還京

論次第兄列為邦前後差十年方一見此別復何嗟極  
目故關道傷心南浦花少時相憶處招手望行車

荅皇甫十六侍御北歸留別作

正當楚客傷春地豈是騷人道別時俱徇空名嗟欲老  
況將行役料前期勞生多故應同病羸馬單車莫自悲  
明日相望隔雲水解顏惟有袖中詩

得柳員外書封寄近詩書中兼報新主行營兵  
馬代書戲荅

郎官作掾心非好儒服臨戎政已聞說劍嘗宗漆園吏  
戒嚴應笑棘門軍遙知抵掌論皇道時復吟詩向白雲  
百越待君言即叙相思不敢愴離羣

同徐侍郎五雲溪新亭重陽宴作

萬峯蒼翠色雙溪清淺流已符東山趣况值江南秋白  
露天地肅黃花門館幽山公惜美景肯為芳罇留五馬  
照池塘繁絃催獻酬臨風孟嘉帽乘興李膺舟騁望傲  
千古當歌遺四愁豈令永和人獨擅山陰遊

奉和中書常舍人晚秋集賢院即事寄贈徐薛

二侍郎

漢家金馬署帝座紫微郎圖籍凌羣玉歌詩冠栢梁陰  
陰萬年樹肅肅五經堂揮翰忘朝食研精待夕陽晴空  
露盤迥秋月瑣牕涼遠興生斑鬢高情寄縹囊歲蕤雙  
鶯鶯夙昔並翺翔汲冢同刊謬蓬山共補亡差池摧羽  
翮流落限江湘禁省一分袂旻天三兩霜石渠遺跡滿  
水國暮雲長早晚朝宣室歸時道路光

登後湖亭傷春懷京師故舊

昨日看搖落驚秋方怨咨幾經開口笑復及看

去聲

花時

世事空名求生涯素髮知山山春草滿何處不相思

前年春與獨孤常州兄花時為別倏已三年

矣今鶯花又爾覩物增懷因之抒情聊以奉

寄

時蒙溪幽居在義興益增懷溯

李幼卿

近日霜毛一番新別時芳草兩迴春不堪花落花開  
處況是江南江北人薄宦龍鍾心嬾慢故山寥落水

滄淪緣君愛我疵瑕少願竊仁風寄老身

荅李滁州見寄

相逢遽歎別離牽三見江皋蕙草鮮  
白髮俱生歡未再  
滄洲獨往意何堅  
愁看郡內花將歇  
忍過山中月屢圓  
終日望君休汝騎  
媿無堪報起予篇

水西館泛舟送王員外

單醪敢獻酢曲沼荷經過汎覽親魚鳥  
寅緣涉菱荷劇  
談增惠愛美景借清和  
明日汀洲草依依奈別何

得李滁州書以玉潭莊見託因書春思以詩代  
荅

春物行將老懷君意詎堪朱顏因酒強白髮對花慙日  
日思瓊樹書書話玉潭知同百口累曷日辦抽簪

題玉潭

碧玉徒強名冰壺難比德唯當寂照心可並滄淪色

荅李滁州憶玉潭新居見寄

從來招隱地未有剖符人山水能成癖巢夷擬獨親猶



肝無足累馬首敢辭勤掃洒潭中月他時望德隣

奉和李大夫同呂評事太行苦熱行兼寄院中  
諸公

駟馬上太行修途亘遼碣王程無留駕日昊未遑歇請  
問此何時恢台朱明月長蛇稽天討上將方北伐明主  
命使臣皇華得時傑已忘羊腸險豈憚溫風熱搖策汗  
滂滄登崖思紆結炎雲如煙火溪谷將恐竭晝景絕可  
畏涼颼何由發山長飛鳥墮目極行車絕趙魏方倣擾

安危俟明哲歸路豈不懷飲冰有苦節會同傳檄至疑  
議立談決況有阮元瑜翩翩秉書札起予歌赤坂永好  
踰白雪誰念剖竹人無因執羈紲

雨晴後陪王員外泛後湖得溪字

遠山媚平楚宿雨漲清溪  
汭任舟楫歡言無町畦  
酒酣相視笑心與白鷗齊

陪王員外北樓宴待月

勸酒論心夜不疲  
含情有待問誰思  
佇看晴月澄澄影

來照江樓酌時

毘陵集卷三

欽定四庫全書

毘陵集卷四

唐 獨孤及 撰

表上

代文武百官賀芝草表

賀擒周智光表

賀袁係破賊表

請降誕日置天興節表

賀櫟陽縣醴泉表

賀太陽當虧不虧表

賀潞州芝草嘉禾表

諫表

為李給事讓起復尚書右丞兼御史大夫表六首

為譙郡唐太守賀赦表

為張濠州謝上表

表上

代文武百官賀芝草表

臣某言臣等伏見開府儀同三司魚朝恩奏含暉院及  
白華亭院內並芝草生者臣等謹披圖按課竊考前志  
蓋王者以道莅天下而德及庶物則有神木靈草儲祥  
効異陛下賢聖恭儉慈仁愛人開闡學校尊教勸德將  
以五經根本庶政風化所浹人神以和和氣傍感蒸而  
為瑞不然豈靈芝菌蠢異處同植不產他宇必於宸居  
暐暐九葩之蓋煌煌三秀之質蓋表陛下之欽明光宅

以人文成化靈根碩茂萬葉無疆神應炳然天意如荅  
臣等獲忝朝列幸覩禎祥臣無任

賀擒周智光表

臣等言臣聞征而無戰王者之師也將而必誅春秋之  
義也臣伏見周智光傲狠頑虐昏迷猖狂敢專生殺之  
威以慢王度崇飾姦慝之志自干天誅陛下謂罪在已  
躬視人如子永言式遏之義不得已而用師而將纔受  
鉞兵未血刃已梟元惡之首載安舊污之俗昔漢征黠



布望陳而憂殷伐鬼方積年乃尅豈若陛下朝命將帥  
夕殲渠魁制勝神速從古未有臣等無任

賀袁係破賊表

臣某等言臣等伏見河南副元帥行軍司馬太子右庶  
子兼御史中丞袁係露布奏今年五月十七日破石埭  
城賊方青并降烏石山賊陳莊等徒黨二萬五千五百  
人者臣聞聖人之生不能使大盜不起故唐虞之代時  
則有三苗之師姦究草竊為患舊矣山賊方青等輩爾

狂狡敢干天誅聚椎剽之徒謂險遠可恃作為蛇豕以薦食勾吳乃有跨據大江吞噬東土之計七州之地人罷耕織百姓業業全活無所陞下方銳志於偃武不得已而用兵乃命將受畧使先勝後戰故倖等役不再舉而師有成績巢窟皆傾俾無遺類詿誤之輩得返故業汙俗更始流人汙康此三代之舉也非陛下齊聖格天文思柔遠豈能底綏盜亂如此其速臣等幸覩成功不勝大慶臣無任

請降誕日置天興節表

臣某等言臣聞天有春夏秋冬夏之氣時也時有分至啟  
閉之候節也至若寒食上巳端午重陽或因人崇尚亦  
播為風俗况厯運光啟聖人降生固宜紀載震之辰與  
八節同號故玄宗生日命曰天長節肅宗生日命曰天  
平地成節並以飲食宴樂布慶萬方便賜及同軌風流  
後代陛下纂祖宗純懿與天地同德禮樂克修憲章咸  
備而誕聖之日未有嘉名將何以表出震之期慶流虹

之瑞率土延企思扇舊風是以臣等顙顙不勝大願願以十月十三日為天興節其王公士庶上壽作樂悉如開元乾元故事上以殷薦崇先天不違之德下以布澤錫萬代無疆之休使知鳳鳴河清實在茲日臣無任

賀櫟陽縣醴泉表

臣等言伏見京兆尹李勉奏櫟陽縣有醴泉湧出飲之者痼疾皆愈臣聞王者澤周庶類則神降百祥天地之心去人不遠陛下厚德載物與坤同符以善利人如水

潤下故后土獻瑞湧泉療疾靈源酌而不竭沈痼飲而  
皆痊勿藥之喜萬人是賴仰窺天意豈不以是彰陛下  
之德施乎不然何衆庶顙顙強名聖水彼丹井朱草白  
麟赤雁徒稱太平之瑞未聞功施於人方之聖泉豈喻  
神異臣等無任喜慶之至

賀太陽當虧不虧表

臣某等言伏見今月一日雲物陰晦太陽當虧不虧者  
臣聞殷太戊宋景公皆修德立言而妖變為福陛下以

金史卷四  
日月薄蝕勞謙惕厲而災不勝德雲為垂陰若天降衷  
使其謫收不見易象曰既憂之咎不長也臣等無任慶  
戴之至

賀潞州芝草嘉禾表

臣某等言臣伏見陳鄭澤潞隴右節度使奏潞州使院  
行軍司馬裴政廳梁柱上生紫芝草七莖長子縣厚載  
鄉生嘉禾兩莖同一穗者臣聞靈芝嘉禾太平之瑞昔  
在周漢嘗表休徵當時福應疾如影響今庶政方乂而

二瑞薦臻是天降殊祥用彰有德豈非陛下實持慈儉  
輯柔遠邇克俾天下和平當如周漢之盛乎神祇景貺  
實堪昭晰彼唐叔之獻與齊房之歌明德所感古今同  
契臣無任

諫表

臣某言伏見陛下屢發德音招延獻納使左右侍臣得  
直言極諫忠謇者無不聽狂訐者無不容又辛丑詔書  
詔裴冕崔渙等十有三人集賢殿待制以備詢事考言

之問此並五帝之盛德也而臣以目睹生則幸矣然頃者陛下雖容其直而不錄其言進匭上封者大抵皆事寢不報書留不下但有容諫之名竟無聽諫之實遂使諫者稍稍自引鉗口就列飽食偷安相招為祿仕此忠鯁之士所以竊歎而臣亦恥之十室之邑必有忠信如孔丘者況以朝廷之大卿大夫之衆而陛下選受之精假令不能如文王之多士堯舜之比屋其中豈不有溫故知新可使懋陳政要而億則屢中者乎陛下惟虛存



其儀令條奏不曠及議政之際曾不採其一說堯之疇  
咨禹之昌言豈若是耶昔堯設謗木於五達之衢孔子  
亦曰以能問於不能以多問於寡又曰丘也幸苟有過  
人必知之然則多聞闕疑不恥下問聖人之心也臣不  
勝大願願陛下試以堯孔心為心日降清問啓其弘說  
不可者罷之可者議之於朝與執事者共之知之必言  
言之必行行之必公則君臣無私論朝廷無私政天下  
無私是陛下以此辯可否於獻替而建太平之階可也

況國體乎自興師不息十年矣萬姓之生產空於杼軸  
擁兵者第館亘街陌奴婢厭酒肉而貧人羸餓就役剥  
牀及膚長安城中白晝椎剽京兆尹不敢詰加以官亂  
職廢將情卒暴百揆隳刺如紛麻沸粥百姓不敢訴於  
有司有司不敢聞於天聽士庶茹毒飲痛窮而無告今  
其心顛顛獨指梅望於麥麥不登則易子齧骨可跂而  
待眠於焚薪之上豈危於此陛下不以此時軫薄冰朽  
索之念厲精更始思所以救之之術忍令宗廟有累卵

之危百姓悼心而失圖臣實懼焉及去歲十二月丁巳  
夜中星隕如雨昨者清明降霜三月苦熱寒暑氣候錯  
綜顛倒沴莫大焉豈下凌上替怨譴之氣焰以取之耶  
不然天意之丁寧譴誠以是警陛下陛下宜返躬罪己  
傍求賢良者而師友之黜棄貪佞不肖而竊位者下哀  
痛之詔去天下所疾苦廢無用之官罷不急之費禁止  
暴兵節用愛人罔使宦官亂國政佞言敗厥度兢兢乾  
乾以徼福于上下必能使天誠感而神心應反妖災以

為和氣彼太戊桑穀宋景熒惑焉足為陛下道哉臣一  
昨陳奏請減江淮山南等諸道兵馬以贍國用陛下初  
不以臣言為愚妄許當施行然及今竟未有沛然之詔  
臣竊遲之今天下惟朔方隴西有吐蕃僕固之虞邠涇  
鳳翔等兵足當之矣自此而往東洎海南至番禺西盡  
巴蜀萬里無鼠竊之盜已積歲矣而兵不為之解傾天  
下之貨竭天下之穀以給不用之軍而為無端之費臣  
不知其故假令居安思危用備不虞自可於阨要之地

少置屯禦餘悉休之以其糧儲匪屨之資充疲人貢賦  
歲可以減國賦之半陛下豈遲疑於改作逡巡於舊貫  
使大議有所壅而率土之患日甚一日是益其弊而厚  
其疾也臣竊惑焉夫療癰者必決之使潰今兵之為患  
患猶癰也不以漸戢之其害滋大而圖之必力倍而  
功寡豈周易不俟終日之義與伏惟圖其始而要其終  
天下幸甚臣無任悚惶之至

為李給事讓起復尚書左丞兼御史大夫第二

表

草土臣某言臣昨以哀瘵愚懇昧死上陳冀迴日月之光曲全螻蟻之志伏奉丁酉詔報未蒙矜允捧讀聖旨五情殞絕臣某中謝臣伏以適四方宣王命之任必擇職位素貴問望炳著學能專對才有餘力者以充其選臣以宗室末屬妄荷寵命惟才與智俱不如人況今衰羸殘喘加以病苦支離沈瘵厯夏及秋終日不過一食不杖不能自起自料若力疾祇命適數千里雖欲自強

必中道委頓墮書詔旨廢失是憂臣伏見廣德二年七月赦書罷天下起復之官許終喪禮此陛下孝德過於兩漢然渙汗之發率土霑霈豈獨令臣隔在赦外又尚書右丞會府之樞轄御史大夫天下之繩準宣慰巡檢朝廷之大寄今臣授此三職而起復為名因臣過舉破陛下法令使百寮師師何以取則臣夙遭不造備生人之艱官始一命先臣棄背慈母鞠育至于成立遭罹二京覆沒弱弟以宗室見害臣惇然茹痛獨侍板輿備嘗

險阻冀及榮養纔擢掖垣慈顏連代罔極之痛終天莫  
追今靈筵未塵墳土尚濕遽令臣荷金印之寵處皇華  
之榮使總帷廓然奠祭無主此恒情之所不忍也陛下  
其忍之乎伏乞以聖慈曲臨皇明下照矜臣卮瘵察臣  
不逮更擇時彥授之使職許臣得以羸骸終其喪紀實  
天地之施鍾於臣身儻殘魂未滅朽質可委誓當摩頂  
至踵以荅聖造臣無任哀瘵懇迫之至

勅卿朝廷雅望宗室良才爰自居喪頗聞過禮將宣國



命允藉親賢舉其權道之文以申必行之旨載循來表具悉哀誠宜抑情而奉公佇銜恤以從政即宜斷表也

### 第三表

草土臣某言臣再以微誠伏闕請命綸言累降天聽未回仰戴聖情俯循哀感悲懼交迫悼心失圖臣某中謝臣才能不及中人且未嘗有毫髮勲効陛下不以臣不肖特降殊私授以驅馳之任賜以親賢之目臣且匍匐奉詔戮力將命寧敢矯禮為名以讓自飾顧臣羸瘵奄

奄行步支離力有所不任用有所不逮風憲重任也宣撫大典也誠恐以疾墜王命隳使職負陛下所舉以重臣之罪方今濟濟多士盈於朝列陛下捨而勿用而拔臣於苫廬之中必以臣智識為小有可採臣之他日猶不如人況今尫劣餘息方寸紊矣焉能為陛下震揚休命覽觀風俗竊自惟忖知不勝任是以拳然丹誠猶冀識察陛下仁聖孝德錫類海內豈令善逮不霑臣身敢希殊造俯遂微懇則死之日生之年也臣無任哀懼之

至

第四表

臣某言一昨臣以哀瘵叨奉恩私封章三上不蒙矜允  
猥以羸繭之質謬銜出疆之命賴陛下威靈免貽咎責  
復得待罪朝闕許守几筵仰荷天慈俯慙靈祐臣某中  
謝頃陛下不以臣駑蹇特加寵渥者豈非知臣屬忝宗  
盟曾奉使河朔謂能闡揚天旨懷柔遠方而尚書省材  
賢如林庶政必舉陛下垂拱羣臣守職固不假臣以區

區之力重尸省闡明矣今將命既復本職未解敢恃皇  
眷輒復陳乞臣竢然在疚獨無兄弟荼毒日淺創鉅痛  
甚且又疾病四體支離榮遇人之所欲力有不任名敢  
虛受此臣所由拳拳不已有望於陛下也臣伏以三年  
之喪未足申罔極之恩先王制禮以節人情臣在喪未  
踰一年奉使已歷三月若又假國家名器食陛下祿俸  
是臣亡母於臣有終身之愛而臣於亡母無數月之報  
先聖以孝感為號陛下以孝德格天下錫類之恩宜及

海內今寵命一降使臣有不孝之目子而不孝如臣不  
忠不孝不忠人所當棄豈足為陛下操持綱轄彌綸憲  
章臣之頑固猶知不可況天下僉論朝廷公議乎伏願  
許臣免官遂臣私志倘終喪紀尚有餘息誓當磨骨粉  
頂以荅殊恩臣無任

第五表

臣某言臣去冬十一月某日又詣銀臺門下上表陳情  
至今積旬未奉恩旨屏營無地哀惶疚心臣某中謝臣

蕞爾朽質叨奉明恩違天固辭豈不知臯實由恃陛下  
蒸蒸之德故敢守臣子區區之意伏以忠孝之道禮先  
於情資親事君愛敬同等臣生處聖代齒力未衰致身  
日長効節途遠獨慈親違棄永往莫追先王制禮居喪  
之紀有限昊天不弔欲報之德罔極而今茹痛緘哀冒  
寵干責雖欲僂俛從事使臣何以為心蓋三年之喪金  
革無避自魯公伯禽晉襄公始也實以徐戎秦師之役  
有為為之非是則否故孔子對子夏問曰以三年之喪

從利者吾不知也今朝廷無徐秦之難臣非金革之任  
竊陛下名器是從利于喪也食稻衣錦之責捨臣誰歸  
凡曲全萬物使不失性天地之仁也鞠育嫗煦知寒熱  
疾痛父母之慈也兼而有之明君之惠也臣是以又持  
惓歎昧死上言竊希天父之恩不奪臣子之志泣血待  
命惟陛下省察臣無任

第六表

臣頃頓首昧死詣闕累陳情狀肝膽悉以披露懇誠冀

蒙識察于今決辰德音不下實由臣詞淺意陋無以動  
天哀惶失圖跼蹐無地臣某中謝臣雖親忝葭莩才實  
駑鈍位忽過量恩亦加等宜竭筋力仰酬造化豈敢飾  
讓自言企禮顧望嘗聞上有至仁之君則下無失性之  
人陛下以蒸蒸聖德格于上下故臣以哀哀孝思敢辭  
榮祿陛下豈忍抑其微誠假令臣損情變禮陳力就列  
亦猶雙鳬乘雁何補江海况敢貪不次之寵遺罔極之  
報因喪從利以哀為榮此臣所以屢黷天威望迴宸聽



懇至之願形於累表拳然待命惟聖慈察之臣無任

第七表

臣某言伏奉某月日批勅矜臣荒謬之情許以殘喘終喪使奉几筵獲展哀報陛下誕敷五教惇敘九族以臣屬忝枝葉哀纏蓼莪故恤以皇慈使及於禮天地之意曲全人欲日月昭迴下及苦廬伏讀詔書感懼交集仰戴聖造若蚊負山屏營瞻奉惶懼殞越臣無任哀戴之至

為譙郡唐太守賀赦表


臣某言伏奉二月五日制書大赦天下喜氣動天榮光  
被物百神踴躍衆庶悅豫臣某中謝臣聞大道所寶莫  
先於慈聖人之德無以加孝陛下執大象以御物不得  
已而用兵假一戎之威為萬物戡難再造區宇以匡黎  
元慈之至也纂服配天不失舊物然後增鴻名以嚴父  
正榮號以恭己元元本本尊尊親親孝之大也猶慮物  
有不遂其性政有不阜其俗弘肆眚之恩與天下更始

滌瑕蕩穢燭幽及微風行物表鏡照海內雷作而萬戶  
蟄振網開而三面鳥飛陽春無私品物何幸臣位忝邦  
守預沐渥恩臣無任

為張濠州謝上表

臣沐言頃陷身凶族待罪黃沙戮社釁鼓職臣之分陞  
下照臣以日月之光察其微懇拔臣于縲紲之下授以  
專城今日餘生實聖朝所賜寵章榮命豈賤臣之心碎  
首粉骨未荅天造今以某月某日到濠州上訖謹當竭

力官守正身率下勉勵苦節綏安疲人冀立犬馬之誠  
或申絲髮之効無任感懼之至謹附表陳謝以聞



毘陵集卷四

欽定四庫全書

集部

毘陵集卷

五至七

詳校官太常寺少卿臣陳桂森

檢討臣何思鈞覆勘

總校官降調編修臣倉聖脉

校對官中書臣陸湘

謄錄監生臣朱輔地

欽定四庫全書

毘陵集卷五

唐 獨孤及 撰

表下

為江淮都統賀田神功平劉展表

為杭州李使君論李藏用守杭州功表

為江淮都統奏破劉展兵捷書表

為江淮節度奏破餘姚草賊龔厲捷書表

為張洪州謝上表

為獨孤中丞天長節進鏡表

為獨孤中丞謝讓官爵表

為獨孤中丞謝紫衣銀盤碗等表

為謝濠州刺史表

謝舒州刺史兼加朝散大夫表

謝加司封郎中賜紫表

謝常州刺史表

常州奏甘露降松樹表

表下

為江淮都統賀田神功平劉展表

臣某言得田神功等狀稱官軍以正月二十六日過江  
大破賊衆擒元惡于蒜山之下兇殘撲滅江界無事臣  
某誠懼誠喜頓首頓首臣聞四時成歲秋為司殺故聖  
人則之以作五兵蓋姦宄寇賊或乘釁而起則干戈弧  
矢亦有時而用

文苑  
作動

自陛下率遏亂略再造區宇櫓槍



旬時

文苑  
作始

竹破瓦解叢爾狂狡敢干天誅作為長蛇薦

食江漢乃矯誣我天命攘竊我王師暴殄我城邑假擾

我邊鄙荆吳之人若墜泉谷萬姓業業奔走無所陛下

神聰不測睿算無方將欲擒之必固縱之先侈其心而

厚其毒然後制勝兩楹之下授畧千里之外使神功等

一戰而臨陣再戰而逐北三戰而擒其渠魁繫頸以索

覆巢傾穴刮野掃地如烈風之破駭浪嚴霜之隕落葉

決辰之內平揚州定淮南下朱方收三吳流亡者復故

業塗炭者返壽域扇以皇風與之更始遂令東土耆老  
復見漢官威儀非陛下乃武乃文之鴻烈日用不知之  
玄化孰能陰隲聖功如此其速臣無任慶忭之至

為杭州李使君論李藏用守杭州功表

臣某言臣聞當逆賊劉展擁兵過江之日變起倉卒鋒  
不可當人心動搖物情危駭五道節制望風潰散自淮  
而南至于海隅遂無敢保一城能守一節者唯少府少  
監李藏用以宗室近屬憂國如家臨危抗憤忠勇奮發

收聚散卒糾合義師挺身履險出萬死一生之地與賊  
轉戰堅守蘇州相持經月殺獲過當使兇徒逆黨鋒銳  
挫衄自此王師載張賊衆知懼其後以外援不至衆寡  
懸絕遂移師就險退保杭州當此時江淮諸軍已散平  
盧之師未至三分全吳賊有其二藏用且募且戰獨守  
孤城以忠義感激令驍雄樂用旬月之內致死士三千  
賊遣偽將景超孫待封等盡銳率衆分道來攻藏用與  
將士等戮力一心義形於色殊死決戰奮不顧身遂能

兵鋒所加無不摧陷皆一舉盡敵覆而屠之前後俘斬  
擄獲至數萬計向使微夫人之力扞此州之境則江介  
土宇盡為戎疆海隅蒼生非復我有由是浙江之外南  
至閩嶺士庶免有驚虞道路窮寇不敢唐突藩籬屏息  
風波晏然百姓樂業父不喪子兄不哭弟藏用之功也  
今都統使傳本職已罷孤軍無主莫知適從將士嗷嗷  
未有所隸天聽高邈無人為言遂使殊勲見委忠節未  
錄口不言賞賞亦不及伏恐非聖朝旌有德表有功之

意今逆寇雖殄人心猶攜山洞海島往往結聚睦州草竊為蠹猶深惟憚藏用之兵是以未敢進逼若此軍一散必羣盜交侵則臣此州危亡是懼伏望早降恩旨以荅其勤錫之勲策委之戎政俾總統所領以鎮遏江表實江東萬姓顙顙之望艱難之際人多二心以宗子維城智勇如此必能使寇賊姦宄不敢伺間隙則江淮足以高枕而卧陛下可以無東顧之憂臣屬忝葭莩任居牧守安危之分臣實預焉臣無任

為江淮都統使奏破劉展兵捷書表

臣聞聖人之生不能使大盜不起唐堯之代時則有四凶在列王制所以誅不恪討不庭小者市朝大者原野姦宄草竊何代無之劉展包藏禍心為日固久敢肆姦慝乘間阻兵長驅凶徒掩臣未備以偽言亂衆謂天命在已於是有多食淮泗鯨吞荆吳之心使黎庶播越人神憤怒臣職司靖難敢不戮力當憑廟略以殄寇讎謹遣副使少府少監攝侍御史李藏用屯兵杭州伺隙進

討且分處隘害以遏其唐突賊衆狃于初役師輕而驕  
不虞我軍能折其銳也乃以今月三日使其偽將軍張  
幹朱法雲等領步卒七千馬軍六百徑入杭州東門焚  
燒閭閻鼓噪而進藏用引其精卒設伏於途羸師張之  
使入死地然後整堂堂之陣以薄其壘使左廂兵馬使  
潭州長史李澄為左軍左第一將張巖光先鋒將李强  
李陵等佐之都押衙高幹為右軍左押衙楊履和都虞  
候魏守寂佐之左第二將皇甫山栖左三將梁朝康承

寂左四將吳季之李楚玉顏光胤等督游軍之騎以彌  
縫其闕表裏合戰奇正夾攻以將帥之餘勇因黎元之  
積憤奮皆敢死登必爭先赤羽交而三軍風生金鼓鳴  
而萬夫氣作自卯至午覆而敗之神扶電怛雷落山破  
噍類無餘隻車莫返鋒鏑之血朱殷長江甲齊崇山屍  
作京觀實賴陛下聰明齊聖與日月合故能審圖發於  
罇俎而威靈加於遠方臣等盡敵如拾芥成功如指掌  
惡氣殄祲掃蕩無日海隅蒼生比屋何幸無任



為江東節度使奏破餘姚草賊龔厲捷書表

臣聞皇天分時秋為司殺王者立極兵以禁暴唐虞有  
共工苗民之患殷周有鬼方昆夷之戰蓋蠻夷猾夏自  
古有之自頃蕃寇作逆吳越震恐龔厲父子乘間起兵  
劫明州之人略餘姚之地負阻海口憑陵江干蟻聚偷  
安蠶食分給屬王師北伐未遑南征逮茲二春侵掠益  
甚將擬復東甌故地窺南越僭迹邊邑黎庶為之騷然  
臣方荷推轂之寄懷盡敵之計思所以扶乘天威圖制

遠略料其貪而無整勇而無剛鳥散獸聚不足當堂堂  
之陣山潛海匿不足用桓桓之師難以力制易以計滅  
臣遂遣軍將潘景蘭領輜馱數十輩偽為商旅傍山谷  
往來以餌之又遣軍將呂道光領拍

音博

刀手一百人取

其便道為伏以待之遣軍將左璋率弩手一百五十人  
為左翼軍將余能變率弩手一百五十人為右翼皆三  
吳良家百越勁卒爭賈餘勇樂於尸戰蓬頭突鬚森騎  
火烈相為輔車夾敵之路又遣軍將張思覽率拍刀手

一百人為中軍操中權之制以節其進退以三月二十九日至青煙洞口果如臣策賊遂出山先者遇伏鼓噪合戰於是奇正畢舉四軍來攻賊衆奪氣不知所守鳴鞀雷動飛鏑雨集轉戰四十里殺其三百餘人龔厲尚稽天誅且偷晷刻收合餘燼八九十人更登高堙背山借勢張思覽等連弩亂發引軍合圍天聲揚而勇士厲銳氣作而妖星隕遂斬元凶父子擒其妻孥餘黨僵仆原隰脂膏草莽猶恐蔣潢翳薈尚有伏姦遂攪山搜谷

刮野掃地傾其巢窟返旆而旋累載逋誅一朝撲滅非  
陛下聖謨神策與天合契制勝兩楹加威四海則安能  
剪豺狼如拉朽掃欃槍如拾芥使吳越乂安江漢澄廓  
臣受鉞未幾覩茲成功無任慶快之至謹差攝福州泉  
山府別將左璋奉捷書以聞并齎逆賊父子頭奉獻伏  
望懸之藁街以示百姓其餘首級於當州梟示訖所獲  
賊物各令分賞將士器械官收山海餘妖自取誅滅既  
非強敵不足叙功謹錄奏聞

為張洪州謝上表

臣某言伏奉某月日勅除臣使持節都督洪州諸軍事  
洪州刺史充洪撫等七州都防禦觀察等使臣才不如  
人位忽過量仰戴天造兢然自失臣某誠惶誠恐頓首  
頓首臣往歲祿山以盜泉飲臣臣受祿山之辱而不能  
死陛下以鴻私活臣臣荷乾坤之施而不能荅徒竊寵  
祿三典藩郡至如俗阜不擾人或小康此實堯風被物  
比屋日用敢貪天功以為己力不謂陛下獎勸是務以

臣為勤自春徂秋凡三錫命九州之伯臣忝其一况豫  
章重鎮荆揚輿區五嶺控其南九江在其北連帥所統  
安危是繫分憂之寄豈臣足當負荷恩輝懼殞越於下  
今以某月日到所部上訖謹當靖恭守位夙夜在公宣  
皇猷以導風俗仗天威以訓師旅庶以四境無虞百姓  
輯睦為報力不足則繼之以死臣之分也敢有二事臣  
無任

為獨孤中丞天長節進鏡表

臣某言臣仕於太上聖皇之朝早蒙寵秩位至剖竹任兼千城摩頂至踵皆聖皇所錫陛下又不以臣菲薄加臣憲威殊私降臨榮命重疊臣頃雖罄誠竭節竟未能夷凶靜難思所以仰酬天造緬邈無階以去年五月五日於淮陽鑄上件鏡欲獻之行在為聖皇壽冀申犬馬之意臣子之心屬豺狼方熾道路艱阻懇願空積上達無由今宸極正而乾坤貞觀驚塵收而日月開朗當白露盛序之秋是黃河澄清之日臣幸逢佳節願展微誠

謹遣某乙進上件二鏡一獻聖皇一獻陛下輒以愚懇  
上續聖壽臣伏以聖皇執契垂化有如金玉之式陛下  
時乘馭天騁飛龍於國步臣故以金龍飾鏡以表聖德  
伏冀纖塵莫翳朗鑒長懸挂仙臺而如日之昇舍品物  
而無私不照而臣之肝膽亦庶呈於此輕黷宸扆戰越  
交深臣無任

為獨孤中丞讓官爵表

臣聞任非其賢則負乘之寇至寵過於分則尸素之患



生所以建官者必惟賢是擇就列者亦量力而處臣幸以駕蹇遭逢盛明頃當過亂之日謬以專城見委雖常嘗膽厯年然未有以報國陛下獎臣微効驟加崇班以執憲剖符之職兼推轂授鉞之寄位至十連澤及三族臣豈不知踰涯越分冒寵叨榮顧凶黨尚存王師未戢當聖主宵衣之日非臣子釋負之秋是以勉勵疲朽不敢陳讓然爾來竟未能奮一奇展一策掃蕩寇賊仰酬恩私而事乖誠願又加風疾無功而當厚賞抱病而處

大藩尸位曠職臣實增懼今聞大軍長驅已濟河圍鄴  
祆氛沴氣朝暮廓清聖朝方當橐弓矢而休牛馬搜俊  
人以備駕鷺豈臣菲薄之質疲繭之身所宜猶握兵要  
仍居寵秩使上黷朝倫下逮官謗以臣固陋猶知其不  
可況陛下聖心乎伏乞特降睿慈矜臣尪瘵許臣停官  
養疾以避其賢良則悽悽餘生於茲幸甚臣無任

為獨孤中丞謝賜紫衣銀盤椀等表

臣某言今月十九日越州長史盧漸至伏奉某日月勅

書特賜慰勞聖藻御札降臨自天二十三日中使劉光俊至又奉宣口勅賜臣衣一副銀盤碗等各一兼百索一筒紫衣十副分賜用命將士端午續命推心而澤流萬里頒賜而慶及三軍臣等捧戴恩渥殞越是懼臣某誠惶誠恐頓首頓首臣拔自周行見委戎律受金鉞分竹符荷天之寵歲一周矣竟未能虔奉廟畧誅鉏殘寇使邊烽尚燃戎馬未却臣之罪也陛下不以臣官非其據任重於力而驟降殊榮累加厚賜天文下矚而星辰

爛燦宸翰俯臨而煙飛雲動況盤盂器用章服繒綵賜  
臣為壽施及行間投醪之恩未足言醉挾纊之德曾何  
喻暖臣等雖勉勵忠勤誓清塵霧然絲髮之効未展兩  
露之渥亟加揣分循涯臣懼深矣謹當宣皇恩以勵將  
帥奉師律以練甲兵必使江海無虞士卒知訓然後畢  
力殄寇以答鴻私臣無任

謝濠州刺史表

臣及言臣伏奉今年五月一日勅授臣使持節濠州諸

軍事濠州刺史臣項待罪禮官備位郎署職曠無補增懼且媿陛下不以臣愚擢居二千石之列今之刺史古之諸侯州人安否繫在一吏臣非其才無以稱旨奉詔之日懼又甚焉以閏六月十二日到所部上訖惟當奉宣聖猷竭誠帥下瞻戀天造酬効無階無任

謝舒州刺史兼加朝散大夫表

臣及言臣奉七月十八日勅加臣朝散大夫使持節舒州諸軍事舒州刺史充當州守捉使兼知淮南岸當界

緣江賊盜等臣典濠州無政可紀人幸不擾時和所致  
流者稍復年登之力臣敢貪此以為已能陛下過聽驟  
降殊獎既增之秩又命以服無德受賞媿孰甚焉仰戴  
皇渥且榮且懼今以九月二十七日到州上訖經積年  
寇盜瘡痍之後百姓流竄十不一存臣以奉宣聖慈與  
之休息勞來鰥寡薄其徭賦是以招攜亡者撫柔存者  
庶經秋之後頗或安集非曰能爾冀竭力焉臣無任

謝加司封郎中賜紫金魚袋表

臣及言伏奉三月一日勅加臣檢校司封郎中使持節舒州諸軍事兼舒州刺史充當州團練守捉使仍知淮南岸當界緣江賊盜賜紫金魚袋殊榮厚渥驟鍾臣身且喜且駭以媿以懼臣聞堯舜建官三考黜陟漢代二千石以循良稱者於是有璽書勞勉增秩賜金之制臣到官始半歲職事未有所補見在戶口纔肯地著其中鰥寡疲弱不能自存者十猶六七徵遣征賦未嘗及期此臣政不逮力不任之効獲宥罪戾幸固深矣豈謂皇

恩驟降復以古典命臣加位授服寵過臣量伏讀詔旨  
懼孰大焉此則古荆舒之地詩人懲其剽輕復當賊寇  
虔劉比屋流亡之後其人心已難安易動况加徭役稅  
歛日不獲已緩之則驕急之則散輯柔底綏之道尤非  
愚臣所及伏思夙夜勉勵力安斯人省事以慰其愁示  
信以杜其諍亦冀俗稍務本人漸足食使貢賦之入歲  
增月長三歲大比以版圖歸於有司犬馬之心也敢有  
二事臣無任



謝常州刺史表

臣及言臣伏奉去年十二月二十三日勅授臣使持節  
常州刺史充常州團練守捉使臣伏以江東之州常州  
為大陛下不以臣不肖拔臣於羣吏之中以考則年未  
久以勞則功無可錄而除拜之次加於人一等臣及誠  
惶誠恐頓首頓首臣往歲嘗忝諫官厯博士尚書郎之  
秩雖備嘗獻納累黷天聽竟無絲髮裨補明盛及典濠  
舒二州出入七年又不能副陛下政平訟息與我共此

之歎至如流人自占旱不為災實由陛下當勤恤之初  
下哀痛之詔寬減租稅入三分之二是以和氣傍感災  
變為福福流臣州人是以又臣寧敢貪天之功以為已  
力今陛下賜臣詔曰斷獄歲減流庸日歸以人俗之豐  
給當淮湖之災旱陟爾明効宜列中朝臣無其實謬奉  
殊獎伏覽聖旨惶悚隕越况陛下厲精百揆之始日以  
堯吁舜咨傍求俊造或經時不除一吏除必以公才為  
苟非其人位不虛授縉紳之輩僥幸望絕臣當如此獨

荷榮寄人之多幸將自臣始致冠速謗實憂自貽今以三月十七日到州上訖雖顧勵疲鈍增修吏職懼力不逮上累皇明奉詔夕惕且慙且駭無任

常州奏甘露降松樹表

臣及言臣州內廳東階下二松樹自今年十月十三日夜至今月十八日夜前後二十七度甘露下降樹根枝葉露灑皆遍潔白凝沍味同飴密餘溜滴地委積成泥頃州官吏咸共榮觀臣謹按鵬冠子云聖王之德上及

太清下及萬靈則甘露下瑞應圖曰王者德至於天則  
甘露降松柏陛下實行慈儉懷柔遠近無為之政與太  
古同風故天地氣和合而呈瑞況休徵感應之始當陛  
下降生之日皇符昭晰天意炳煥蓋表聖壽寶曆將與  
天比崇臣為州三年無績可紀疲朽何幸目覩禎祥臣  
無任喜忭之至謹奉表以聞伏望宣付史館

毘陵集卷五